

### **Кондак 1**

Избранней от всех родов Божией Матери и Царице пред пречистым Ея образом со умилением хвалебная пения приносим; Ты же, яко имущая к роду христианскому милосердие неизреченное, от бед и скорбей избави всех нас, Тебе зовущих:

Радуйся, Невесто Неневестная.

### **Икос 1**

Архангелов и Ангелов чини благоговейно Тебе служат и вся Небесныя Силы немолчными гласы Тя, Богородице Дево, воспевают, яко рождшую небесных воинств Царя; мы же земнороднии, со трепетом предстояще чудотворному лику Твоему бренными устнами вопием Ти сице:

Радуйся, от всех родов ко искуплению рода нашего избранная.

Радуйся, Духа Святаго дарований преисполненная.

Радуйся, Херувимов и Серафимов превозшедшая.

Радуйся, таинству спасения рода человеческого послужившая.

Радуйся, святое вместилище Слова Божия.

Радуйся, неописанное Слово Отчее в ложеснах Своих носившая.

Радуйся, пророческих глаголов неложное исполнение.

Радуйся, вину прародителей рода нашего рождением Твоим искупившая.

Радуйся, предстательство роду христианскому от Бога дарованное.

Радуйся, спасения рода человеческого начало.

Радуйся, лестнице Божественного снисхождения.

Радуйся, мосте от земли к небеси земнородных возводяй.

Радуйся, Невесто Неневестная.

### **Кондак 2**

Видящи Пречистая с высоты небеснаго жилища Своего, идеже с Сыном Своим во славе пребывает, озлобление противу святынь христианских во стране Грузинстей, поущением Божиим во дни оны бывшее от Персского царя Аббаса, Грузинскую страну разорившаго и храмы ея христианския осквернившаго, и хранящи святую икону от такового поругания, страны Российския мужу верну и благоговейну Стефану благопромыслительне ведати ю вспомоществовала еси, Владычице. Стяжав убо сей верный раб святыню Твою, во умилении сердца возопи Богу: Аллилуия.

### **Икос 2**

Разумети хотя благоговейный муж Георгий недоуменную тайну откровения Твоего, Владычице, о некоем безценном бисере, приставником имения его во стране Персидстей приобретенном, с Патриархом Филаретом совещающа. Мы же таинственному вразумлению Преподобнословенная, свыше верным рабом подаваемому, дивящася, благоговейно вопием к Ней:

Радуйся, сокровенныя тайны благодати Божия верным открывающая.

Радуйся, устнами православных хвалу Богови совершающая.

Радуйся, неверных агарян, святыню Твою презревших,

посрамляющая.

Радуйся, славою чудес Твоих верных смыслы озаряющая.

Радуйся, почитанию святых икон нас наставляющая.

Радуйся, Христову веру во стране нашей утверждающая.

Радуйся, обитель иноков Красныя Горы святым Твоим образом освящающая.

Радуйся, день принесения честныя Твоея иконы изцелением инока знаменовавшая.

Радуйся, безценный бисер, святую Твою икону, якоже рекла еси, нам даровавшая.

Радуйся, безценный бисер, Христа, на спасение наше рождающая.

Радуйся, честным Твоим образом страну нашу посетившая.

Радуйся, мирную обитель иноков неотъемлемым богатством обогатившая.

Радуйся, Невесто Невестная.

### **Кондак 3**

Сила Вышняго осеняет выну с верою притекающих к державному покрову Твоему, Владычице, и благоговейно чтущих чудотворную икону Твою, Богомати; ей бо дадесе благодать от Бога всяк недуг и всяку язю в людех врачевати, темже благодарственно вопием Богу: Аллилуия.

### **Икос 3**

Имеючи промышление теплое о людех страны зимняя полунощи, Гору Красную под кров Твой, Богомати, прияла еси, и обители иноков тоя честный образ Твой милостивно даровала еси, да зряще токи чудес, преизобильно на молящихся Тебе с верою изливаемая, во умилении вопиют Тебе, Владычице:

Радуйся, смиренную обитель иноков Красныя Горы державным покровом Твоим осеняющая.

Радуйся, чудесами от святых Твоея иконы Гору Красную прославляющая.

Радуйся, подобие благодатнаго Афона во стране зимней полунощи явившая.

Радуйся, Гору Красную житию иноческому чудно указавшая.

Радуйся, в щит и ограждение места того цельбоносную икону Твою даровавшая.

Радуйся, поселившимся на сей святей горе иноком обитель тихую создавшая.

Радуйся, житие чина иноческаго во спасение душ устрояющая.

Радуйся, всем хотящим улучшить спасение споборствующая.

Радуйся, Красную Гору и обитающих на ней благодатным Твоим омофором покрывающая.

Радуйся, притекающих к Твоему покрову и заступлению не оставляющая.

Радуйся, слабых на пути добродетели укрепляющая.

Радуйся, заблуждших на путь истинный наставляющая.

Радуйся, Невесто Невестная.

### **Кондак 4**

Бурю внутрь имея помышлений сумнительных слепец Питирим,

егда озарен бе сиянием света, яко солнечным, смятеся и страхом обдержим бе, мняше о сем, яко о наваждении бесовстем; многа бо лета слеп бе, с молитвою знамение креста сотвори, обращаеся ко храму и узре чудную Твою, Владычице, икону, светозарными лучами во храме блиставшую, абие уразуме, яко отверзошася очи его и слух его открыся, благодарственное принес Богу, дивному в делах, пение: Аллилуия.

#### **Икос 4**

Слышав благоверный Царь всея России Алексей, яко от святых иконы Твоея, Владычице, яже на Горе Красней, цельбы многоразличных недугов обильно подаются, даде повеление игумену обители по градом и весем Великия державы своея с честью подобающею обнести; да приемлют страждущи врачевство недугов телесных и душевных и во умилении сердец зывают Тебе, Владычице:

Радуйся, Христа Бога нашего освященный храм.  
Радуйся, неизреченная Его славы вместилище.  
Радуйся, Царя царствующих одушевленный град.  
Радуйся, палато и чертоже небесный.  
Радуйся, Церкви православных похвало.  
Радуйся, державы Российския крепосте и утверждение.  
Радуйся, градов и весей наших благодатное охранение.  
Радуйся, всех христиан, к Тебе притекающих, непостыдное упование.

Радуйся, от всех родов достойно ублажаемая.  
Радуйся, всех нас от бед и скорбей пришествием честнаго Твоего образа избавляющая.  
Радуйся, сущих в странствии ко взысканию горняго града направляющая.  
Радуйся, Путеводительнице наша к вечным обителям.  
Радуйся, Невесто Невестная.

#### **Кондак 5**

Боготечней звезде подобна явися Твоя, Богомати, икона, по воли Твоей святей от востока на самую полночь принесенная, юже, яко дар небесный, восприемше иноцы Красногорстии, поставиша в соборную церковь обители, и в веселии пояху благих Подателю Богу: Аллилуия.

#### **Икос 5**

Видящи среброковача Гавриила, зельне плачуша пред Твоим чудотворным образом, Владычице, якоже бо тогда умилосердися, сына его на одре болезни лежаща воздвигла и здрава сотворила еси, сице и о мне, умилосердися, Преблагословенная Богородице, и грехми умерщвленную мою душу воскреси, зовущу:

Радуйся, Мати Царя живота и Победителя смерти.  
Радуйся, благоволение Сына Твоего, Христа Бога нашего, нам стяжавшая.  
Радуйся, светлыми лучами чудес от святых Твоея иконы страну Российскую озаряющая.  
Радуйся, богатые дары изцеления и милости просящим у Тя пред чудною Твоею иконою источающая.  
Радуйся, моления наша, приносимая Тебе с верою и любовию

милостивно приемлющая.

Радуйся, телесные недуги верно почитающих Тя скоро изцеляющая.

Радуйся, печаль нашу в радость претворяющая.

Радуйся, от слез и скорбей нас избавляющая.

Радуйся, скорбных о чадах родителей утешение.

Радуйся, чад их благодатное охранение и спасение.

Радуйся, покрове нам в животе и по смерти.

Радуйся, спасение наше на праведном Суде Божиим.

Радуйся, Невесто Невестная.

### **Кондак 6**

Проповедника творящи купца Георгия воли Своя, рекла еси к нему, Владычице: приставник имения твоего Стефан, сый в Персиде, купи тебе безценный бисер, егда же принесет к тебе, ты поели оный в Двинскую область, на Чермную гору. Познав убо о сем Георгий Твое, Пречистая, к месту тому особое благоволение, воспряну воспети к рождшемуся от Тебе Богу: Аллилуия.

### **Икос 6**

Возсияла слава Божия на святей Горе Красней от пречудных Твоя иконы, Богомати, пред неже предстояще, со умилением молимся Ти, услыши нас, вопиющих Тебе усердно:

Радуйся, гору полунощную пришествием чудотворнаго Твоего образа осенившая.

Радуйся, чудес неоскудевающий источник на ней явившая.

Радуйся, милосердие и любовь Твою ко обители иноков показавшая.

Радуйся, благое о ней промышление Свое явившая.

Радуйся, телесныя недуги наша врачующая.

Радуйся, в душевных скорбех нас утешающая.

Радуйся, благочестия Наставнице.

Радуйся, иноческаго жития Руководительнице.

Радуйся, добрыя ко спасению душ обеты приемлющая.

Радуйся, благим намерением и начинанием нашим способствующая.

Радуйся, злыя от наваждения врага бываемая помыслы от нас отгоняющая.

Радуйся, вражия козни, яко паучину, расторгающая.

Радуйся, Невесто Невестная.

### **Кондак 7**

Хотя дати благословение новоустроенной обители иноков, Раифской нареченной, Архипастырь Казанский Лаврентий, лик Твой, Владычице, от чудотворнаго Твоего Красногорскаго образа тождественно списав, торжественно с молебным пением, во обитель Раифскую внесе. Свидетелем же быв совершившихся от сея святых Твоя, Владычице, иконы знамений и чудес, радостно возопи Богу: Аллилуия.

### **Икос 7**

Новую купель Силоамскую зрим, Пречистая Богородице, храм Твой, иже в Раифе, всяк бо недуг и всяку язю душевную и

телесную врачуеши с верою и любовью к Тебе притекающих и благоговейно чтущих и лобызающих святой образ Твой. Сего ради, имуще новое неизреченное сокровище Твоих милостей, радостно вопием Ти, Пречистая:

Радуйся, купель, в нейже душевныя недуги наша врачуются.

Радуйся, источнице, жаждущим воду жизни источивший.

Радуйся, слепым телесными очима зрение подавающая.

Радуйся, глухим слух отверзающая.

Радуйся, расслабленные телом укрепляющая.

Радуйся, лежащая на одре болезней возставляющая.

Радуйся, плавающая по водам от бурь и потопления спасающая.

Радуйся, влающая в пучине житейского моря к тихому пристанищу спасения направляющая.

Радуйся, оружие, имже устрашаются полки демонския.

Радуйся, щите, имже покрываются обители иноков.

Радуйся, тихое пустынножителей веселие.

Радуйся, тихое обуреваемых в сем веке пристанище.

Радуйся, Невесто Невестная.

### **Кондак 8**

Странно слышати и неудобно разумети злым неверием омраченным, како от святых икон Твоих, Владычице, знамения и чудеса бывають; нам же, тепле верующим словеси, Тобою к первоначертанней благовестником евангельских тайн святей иконе реченному: «Благодать рождаемого от Мене и Моя с сим образом да будет»,— удобно есть разумети и праведно уповати, яко и со святою Твоею иконой «Грузинскою» благодать Твоя и сила пребывает выну. Сего ради с благоговейным страхом предстояще, чтим и воздаем ей честь, яко Тебе Самой, нам присущей, радостно поюще Богу: Аллилуия.

### **Икос 8**

Вся присно горе суши и с Небесными Силами выну пребывающи, нас, земнородных, не оставляеши, Богомати, теплым предстательством пред Сыном и Богом Твоим, матернее бо дерзновение к Нему имаши. Сего ради предстояще пречистому Твоему образу, со слезами покаяния вопием Ти, Богородительнице:

Радуйся, Путеводительнице верная, к небесному отечеству добре нас направляющая.

Радуйся, Мати Царя небеси и земли, врата райские нам отверзающая.

Радуйся, Домостроительнице, житие наше к небесному устрояющая.

Радуйся, вечная блага Сына Твоего нам являющая.

Радуйся, от скорбей и бед zde нас спасающая.

Радуйся, вечных мук и огня гееннского по смерти нас избавляющая.

Радуйся, всех притекающих с верою и любовью к Тебе сугубо милующая.

Радуйся, молитвы наша, приносимыя Тебе пред чудотворным Твоим образом, ко престолу Сына Твоего и Бога нашего возносящая.

Радуйся, благая наша Помощнице.

Радуйся, непостыдное наше упование и верное спасение.  
Радуйся, Невесто Невестная.

#### **Кондак 9**

Всякаго естества Архангельскаго и Ангельскаго Превышшая, Херувим и Серафим Честнейшая, Пресвятая Дево, Бога бо Царя Небесных Сил плотию родила еси, носящаго весь мир дланию на руках носила еси, и всякое естество питающего млеко питала еси. Темже воистину Матерь Божию и Ходатаицу рода христианскаго Тя ведуще, со дерзновением вопием Богу: Аллилуия.

#### **Икос 9**

Ветии многовещанная не ведят киими словесы благохвальными подобает величати Тя, Богомати, по достоянию, недоумет бо всяк язык достойно пети Тя, Богородице; обаче, Благая сущи, прими милостивно, аще и немощными смысли сложенная, но от чистаго сердца приносима Тебе в похвалу сицевая пения:

Радуйся, Пренепорочная Отроковице, Превечным Советом ко спасению рода нашего избранная.

Радуйся, Жено, Еяже семя сокруши главу древняго змия.

Радуйся, в женах Преблагословенная.

Радуйся, благодать у Бога обретшая.

Радуйся, Архангельское вещание о воплощении Единого от Святыя Троицы смиренно приявшая.

Радуйся, кроткая Раба Господня.

Радуйся, сосуде, Духом Божиим освященный.

Радуйся, силою Вышняго осененная.

Радуйся, Спасителя наших душ рождающая.

Радуйся, падший род наш с правосудием Божиим примирившая.

Радуйся, Едем затворенный рождеством Твоим миру отверзшая.

Радуйся, от пленения ада рождеством Твоим свободившая.

Радуйся, Невесто Невестная.

#### **Кондак 10**

Спасти хотящи многия люди от бед и скорбей, всюду являеши, Богомати, роду нашему неоскудеваемый от своея иконы «Грузинския» источник милости. Красногорскую бо обитель от запаления огненнаго во дни оны неврежденну сохранила еси, угасивши свирепеющую окрест ея силу огненную, в царствующем же граде Москве и в пустыни Раифстей благодати струи от иконы Твоея источаеши всем, с верою покланяющимся Тебе, и во иных градах и весех наших чтущим Тя полезное подаеши. Темже, прославляюще Бога, даровавшаго нам о Тебе благодать таковую, присно вопием Ему: Аллилуия.

#### **Икос 10**

Стена еси крепкая, Богородице Дево, обители Красногорския и пустыни Раифския ограда несокрушимая, чину же иноческому украшение и слава. Сего ради, молящися, вопием Ти, Пречистая: покрый с верою покланяющихся Тебе пред Твоим чудотворным образом от бед и скорбей, с любовию Тебе вопиющих:

Радуйся, крепкая от находящих на ны напастей и бед

Хранительнице.

Радуйся, обителей иноческих неусыпная Блжстительнице.

Радуйся, от свирепеющего пламене, во дни оны, обитель Красногорскую, по теплому молению иноков, дивно сохранившая.

Радуйся, благорастворение воздушных и спасительный дождь благовременно той ниспославшая.

Радуйся, житий чина иноческого украшение и доброто.

Радуйся, в бурю искушений и бед нас спасающая.

Радуйся, помышления наша освящающая.

Радуйся, сердца наша очищающая.

Радуйся, душегубительный пламень страстей наших угашающая.

Радуйся, мрак сатанинских искушений рассеивающая.

Радуйся, житию нашему благословение Божие низводящая.

Радуйся, мысленная очеса наша к горным обителям направляющая.

Радуйся, Невесто Невестная.

### **Кондак 11**

Пение хвалебное приносят Ти, Владычице, людие богоспасаемого града Архангельска, егда град их единок в лето освящается пришествием Твоего чудотворного образа, и со светильники и кадиланицы грядуще во сретение его, радостно вопиют Богу: Аллилуия.

### **Икос 11**

Светозарными лучами чудес икона Твоя, Владычице, на святей Горе Красней немерцаемо сияет и Российскую страну нашу православную благодатно озаряет, прогоняюще всякое темное действие вражие силою Божиею, побуждаючи нас пред нею Тебе, Богоизбранная Отроковице, хвалебная пения возносити:

Радуйся, на пути нашего спасения неугасимый светильниче веры и благочестия.

Радуйся, луче незаходимаго Солнца.

Радуйся, немерцающая во стране нашей православия звезда.

Радуйся, добродетели путь освещающая.

Радуйся, заре, Солнце правды являющая.

Радуйся, свете, мрак неведения отгоняющий.

Радуйся, Купино неопалимая, Бога явившая.

Радуйся, престоле огненный Вседержителя.

Радуйся, чистоты сокровище.

Радуйся, Цвете неувядаемая славы.

Радуйся, Вышняго освященное Божественное Селение.

Радуйся, яко Тобою дадеся радость всем, Тя, Богородице, зовущим.

Радуйся, Невесто Невестная.

### **Кондак 12**

Благодати Твоя никогдаже оскудевающая неизсякаемый источник явила еси, Богородительнице, чудотворную Твою икону, от неяже вси скорбящие и обремененнии грехи многими спасение и цельбы во вся времена приемлют и радостно о Тебе воспевают Всеблаговому Богу: Аллилуия.

## Икос 12

Поюще Твоя преславная чудеса, Богомати, от святых Твоя иконы неоскудно нам подаваемая, и вся упования наша на Тя, Заступнице, возлагающе, со умилением вопием Ти:

Радуйся, непостыдное христиан упование в будущем веце.

Радуйся, в делании заповедей Сына Твоего пребывающих спасающая.

Радуйся, в животе сем нас во здравии сохраняющая.

Радуйся, в страшный час смерти нас не оставляющая.

Радуйся, верным рабом Твоим христианскую кончину устрояющая.

Радуйся, на Суде праведном Сына Твоего верным слугам Твоим воделенный глас Его слышати сподобляющая.

Радуйся, всем хотящим спастися и в разум истины прийти благая Одигитрие.

Радуйся, всех, в сокрушении сердечном кающихся грешников, несомненное спасение.

Радуйся, рождеством Твоим двери рая миру отверзшая.

Радуйся, земнородных с небесными к вечному веселию сочетавшая.

Радуйся, от Ангел присно воспеваемая.

Радуйся, и от земнородных достойно ублажаемая.

Радуйся, Невесто Невестная.

## Кондак 13

О, Всепетая Мати, Пресвятая Госпоже, Дево Богородице, не отрини сие малое моление наше, смиренно приносимое Тебе ныне пред чудотворным образом Твоим. Презираючи на бездну грехов наших, избави всех нас от бед и скорбей в животе сем и грядущия вечныя изми муки нелицемерно о Тебе вопиющих Богу: Аллилуия.

**Этот кондак читается трижды, затем икос 1-й «Архангелов и Ангелов чини...» и кондак 1-й «Избранной от всех родов...»**

## Молитва первая

Приими, Всеблагословенная Пречистая Госпоже Владычице Богородительнице, сия честныя дары от нас, недостойных рабов Твоих, к Твоему цельбоносному образу пение возсылающих со умилением, яко Тебе Самой сущей ту и послушающей моления наша и подающей с верою просящим по коемуждо прошению и исполнению: скорбящим скорби облегчаеши, немощным здравие даруеши, расслабленных и недужных изцеляеши и от бесных бесы прогоняеши, обидимыя от обид избавляеши, и насилуемых спасаеши, грешных прощаеши, прокаженных очищаеши и малых детей милуеши, и неплодныя от неплодства разрешаеши. Еще, Госпоже Владычице, от уз и темниц свобождаеши и всякия многоразличныя страсти изцеляеши, и болезни очес врачуеши, и от смертоносныя язвы избавляеши: вся бо возможна суть ходатайством Твоим к Сыну Твоему, Христу Богу нашему.

О, Всепетая Мати, Пречистая Богородице! Не преставай молити о нас, недостойных рабах Твоих, славящих Тя и почитающих, и поклоняющихся пречистому образу Твоему и надежду имущих невозвратну, и веру несумненну, к Тебе, Приснодеве, Преславней и Непорочней, славящих и чтущих и поющих Тя во веки



веков. Аминь.

### **Молитва вторая**

К Тебе, Богоизбранная Отроковице, Пресвятая Дево Богородице, небесе и земли Царице, припадающе вопием: услыши молений наших глас и не отврати лица Твоего от нас, недостойных. Приими, Всеблагая, от недостойных раб Твоих, чтящих всечестное имя Твое, и с верою поклоняющихся Тебе пред чудотворным Твоим образом, приносимое ныне теплое моление наше: вознеси е к престолу Сына Твоего, Христа Бога нашего, да милостив будет к неправдам нашим и не воздаст нам по делом нашим, но да пробавит щедроты Своя. Ве мы, яко несмы достойни, по грехом нашим, от Него помиловани быти, аще не Ты, Владычице, умолиши Его о нас: вся бо можеша испросити у Него, матернее бо к Нему имаши дерзновение. Сего ради к Тебе, яко Всемощней и Всеблагой Заступнице нашей прибегаем, усердно молящиеся: испроси у рождагося от Тебе Единороднаго Сына Божия, Христа Бога нашего, всем нам в святоотечестей православной вере твердое, до конца дний наших пребывание и во всех заповедех Господних неуклонное хождение, да прочее время живота нашего поживше во всяком благочестии и чистоте, сподобимся мирных христианских кончин и добраго ответа на Страшнем Суде Сына Твоего и Бога нашего. И тако достигнем, под кровом Твоея помощи, живота вечнаго во царствии Отца Светов, Емуже, купно со Единородным Его Сыном и Святым Духом, подобает слава, честь и поклонение, ныне и присно и во веки веков. Аминь.

### **Тропарь Божией Матери ради иконы Ее Грузинская**

#### **Тропарь, глас 4:**

Днесь светло красуется обитель Красногорская, и с нею ликовствует Раифская пустыня, яко зарю солнечную, от востока возсиявшую, восприимши, Владычице, чудотворную Твою икону, еуже разгоняеши мглу искушений и бед от вопиющих верно: избави обитель нашу и вся страны христианския от всех навет вражиих, и спаси души наша, яко Милосердая Заступница рода христианскаго.

#### **Ин тропарь, глас 5:**

Веселятся православнии народи, видяще, Владычице Дево Богородице, Твою пречудную и чудотворную икону, и приемлют врачевство душевное и телесное Твоею милостию всегда. Темже и мы, поклоняющиеся оней, усердно Тебе вопием: помилуй, Благая Мати, смиренныя рабы Твоя, и избави нас от всякаго зла и навета вражия, молящи Сына Твоего Господа Иисуса, да, спасешся zde, небесное жительство получим человеколюбием и благодатию Его.

#### **Кондак, глас 8:**

Тебе, Избранней от всех родов, Божией Матери, благодарственная пения приносим, пришествием честных Твоея иконы, раби Твои, Богородице, озаряеми, но, яко имущая державу непобедимую, от всяких бед свободи, да зовем Ти: радуйся, Невесто Невестная.

### **Ин кондак, глас 6:**

Аще попущением Божественным от рук неверных честная Твоя, Владычице, икона поруганию подвержена и копием варвар прободена бысть, обаче во стране нашей Православней любочестно всеми прославляется и благоговейно почитается, сего ради Тобою являет слепым зрение, глухим слышание, немым глаголение, хромым хождение, разслабленным укрепление, скорбным утешение и отраду. Сих ради молим Тя, Милосердная Мати, до конца пробави милости Твоя на нас, яко Благая.

### **Величание**

Величаем Тя, Пресвятая Дево, Мати Христа Бога нашего, и чтим образ Твой святой, от негоже источаеши исцеления всем с верою к Тебе притекающим.

Память 22 августа/4 сентября

Празднество в честь Грузинской иконы Божией Матери